

**Москва ва Бутун Рус патриархи КИРИЛЛнинг
архипастирлар, пастирлар, диаконлар, роҳиблар ва Рус Православ
Черковининг барча содиқ фарзандларига
Пасха хабарномаси**

**Художўй муқаддас архипастирлар, ҳақиқатгўй пресвитер ва диаконлар,
ибодатгўй роҳиб ва роҳибалар, азиз биродарлар ва опа-сингиллар!**

МАСИҲ ТИРИЛДИ!

Ушбу ҳаётбахш ва маънавий қувватга тўла сўзлар ила сизларни муқаддас Пасха байрами билан чин қалбимдан қутлайман.

Черков анъанаси бежизга бу кунни *байрамлар байрами* ва *тантаналар тантанаси* деб атамайди, зеро Исо Масиҳнинг тирилиши – бизнинг эътиқодимиз ва умидимизнинг мустаҳкам асосидир. Унда ҳар бир инсоннинг янгиланиши ва маънавий ўзгариши, абадий ҳаёт нури ва сўнмас шодлик манбаи мавжуд. Исо Масиҳнинг тирилиши инсониятнинг энг даҳшатли душманлари – гуноҳ ва ўлимни йўқ қилди, инсонлар ва Худо ўртасидаги тўсиқни бартараф қилди ҳамда бизларни ёвузлик ҳукмронлигидан озод этди.

Нажоткорнинг Тирилишни улуғлаб, муқаддас Николай Сербский шундай ёзган эди: *«Масиҳнинг ғалабаси – биринчи одамдан тортиб сўнгги инсонгача шодланиши мумкин бўлган ягона ғалабадир. Ердаги ҳар қандай бошқа ғалаба одамларни ажратган ва ажратади... Лекин фақатгина Масиҳнинг ғалабаси – қуёш каби бўлиб, унинг нури барчага баробар ёғилади»* (Сухбатлар. Ўлимни енгувчи ҳақида хусхабар).

Бу шуни англатадики, нажотга интилаётган ҳар бир инсонга, ҳар бир имонли, Масиҳ йўлидан боровчига гуноҳ устидан ғалаба қозониш ҳамда ва Инжил воизи ҳаворий Юҳанно айтганидек, Худонинг *севиқли фарзанди* бўлиш имконияти берилган (1 Юҳанно 3:1).

Биз Пасхани қадимги яҳудийлар сингари – ваъда қилинган ерга – кўчиш байрами сифатида эмас, балки бошқа талқинда тантана қиламиз. Қадимги яҳудийлар Қадимий Аҳд пасхасини Миср асирлигидан озод бўлганлари кун сифатида шодлик билан нишонлар эдилар. Бизнинг Пасхамиз бошқа маънога эга. Парвардигор бизни *гуноҳнинг зулмати* ва *ўлим соясидан* халос этиб (Луқо 1:79), бизга Самовий Салтанатни инъом этди.

«Қаро зиндонда ўтирган бадбахтларни Исо Масиҳ озодликка олиб чиқди – уларни Жаннат тоғларига шодлик билан кўтарди» (Мадҳия XXXVIII), – деб ёзган эди муқаддас Ефрем Суриялик. Унинг бу илҳомбахш сатрлари Пасха сирини – инсонни ёвузлик таъсиридан нажот топтириш сирини чуқур англашни ифодалайди. Ёвузлик йўқ бўлмади, аммо инсон Худонинг фазли билан унга қарши курашиш ва уни мағлуб этиш имкониятига эга бўлди – бу покланиш, дуо ва муқаддас Евхаристия сирида Нажоткорнинг Тани ва Қонига шерик бўлиш орқали рўй беради. Шунинг учун ҳаворий Павел билан бирга ишонч билан айтамызки, *Исо Масиҳни ўликдан тирилтирган Худо юрагингизда яшаётган Ўз*

Рухи орқали сизларнинг фоний танангизни ҳам ўликдан тирилтиради (Рим. 8:11).

Масиҳий Пасха ердаги фаноликдан абадий ҳаётга, Яратувчимиз ва Нажоткоримиз билан бирлашишни англатади. Шунинг учун, биз учун тирилган Исо Масиҳга шодланиб ва нажот косасини миннатдорлик билан қабул қилиб (Забури 115:4), Черков бизга ҳақиқий Абадий Озуқани – Масиҳнинг Тани ва Қонини тақдим этгани учун, Парвардигорни муҳаббат ва раҳм-шафқат амаллари билан улуғлаб, Унинг содиқ шогирдлари сифатида ўзимизни намоён қилайлик.

Ваҳоланки, яхшиликка интилишимиз ва Худо йўлидаги муваффақиятларимиз баъзан бева аёлнинг камтарона садақаси каби кўриниши мумкин (Марк 12:42). Аммо биз доимо имонимиз қатъийлиги ва умидимиз мустаҳкамлигини сақлашга ҳаракат қилайлик, *Раббимиз йўлида қилган меҳнатингиз самарасиз қолмаслигини биламиз* (1 Коринф 15:58).

Тирилган Нажоткорни ҳамду сано билан улуғлайлик, бир-биримизни муҳаббат билан бағримизга босиб, ҳаёт йўлимизда Раббий бизга йўқлиқтирган ҳар бир инсонга ўчмас Пасха шодлигини улашайлик, сўзимиз ва амалимиз билан гувоҳлик берайлик, чунки у

ҲАҚИҚАТДАН ҲАМ ТИРИЛДИ!

МОСКВА ВА БУТУН РУС ПАТРИАРХИ

Масиҳ Пасхаси
2025 й.